

原輯南嶽志廿六卷

第一冊

鹿野志

王香余題簽

民國十二年歲
次癸酉

序

粵稽上古循蜚疏仡之代封泰山禪梁甫凡七十二家勒石千八百餘處維南有衡並峙爲五計必有車轍馬跡焉炎維荒遠遐哉弗可攷矣軒昊氏作乃命赫胥居南重黎司火正祝融氏爲司徒越在伊祁姚姒五載一巡狩著在典謨有虞氏有寶露之賜夏后氏得金簡玉字之書箕乎尙已周初泰伯虞仲采藥茲山穆王周行天下亦有西臺之蹟降及秦皇由西南渡淮水之衡山浮江至湘山祠大風不得渡於是怒伐湘山樹赭其山暴君之轍靈嶽蓋堅拒焉漢武以瀟霍本衡山之副衡山道遠徙祭於廬江之瀟山繆矣魏晉六朝禪祀復古惟北周十字分裂望祀於天門山至隋

復其故唐宋元明典禮加敕

聖清膺期懷柔震疊逢 國大慶必遣使祭告

歷朝宸題光倬雲漢烏庠可謂盛矣攷地志家紀南嶽自舜典禹貢周禮職方氏爾雅山海經外南齊宗測唐徐靈期並有衡山記唐道士李沖昭有南嶽小錄宋李芾有南嶽記錢景衍有南嶽勝概張隱有南嶽要錄僧文政有南嶽勝遊錄道家有南嶽證勝錄於是陳田夫合之爲總勝集皆宋人也書多不傳其軼時見於他說今列入 四庫者惟李沖昭之小錄暨明彭簪之衡嶽志耳國初王船山先生蒐微洗邈作蓮峯志五卷表章朱張二子方廣之遊爲茲峯獨闢生面其自序謂海南鄧雲霄修全志所屬非人

山之有專志實始南北朝及唐蓋多出道流棲真者之所爲宋明以後踵爲之益多衡山志代有專書而訖無傳於世豈果南方僻陋無與張而大之固疑其文猶有未厭人心者也當順治初元船山王氏纂輯蓮峯志爲衡山之一峯其事典則其文雅馴凡歷二百二十年威毅伯曾公棻行王氏遺書其書始顯又二十年次青衡山志成盡攬七十二峯之勝而其體例猶受成船山蓮峯志載朱張祠嘉會堂船山經營成之蓮峯志之作猶以朱張二先生也次青亦經營廟殿以成此志蓋自船山發其端而次青總其成此豈爲無因而偶合者酈道元水經注自謂山水有靈亦驚知已次青爲功衡山尤大而若衡之爲山晦於秦顯於南宋而大昌於今

日世運之變遷人文之升降若隱繫於其中豈惟茲山之靈異沛然伸於知己饜飫乎吾楚而甄貺無窮亦將有資於來葉也時光緒九年歲次癸未秋七月湘陰郭嵩燾謹序

重脩南嶽志序

往讀爾雅釋山首列九山而後乃云霍山爲南嶽茫然莫喻其義
道家因有黃帝省方建瀋霍爲南嶽之說及讀宏農太守爾雅序
稱其書興於中古隆於漢氏始悟武帝元封五年登瀋天柱山命
曰南嶽因增益爾雅之文以實其義又更易河南華河西嶽二語
使與五嶽參差推溯其由來自楚考烈王徙都壽春仍名之郢乃
移衡山之名於六移九江之名於壽春是以秦時名禹貢衡山曰
湘山而名瀋霍山曰衡山蓋襲楚之舊名也武帝承之徑名瀋霍
爲南嶽此足證爾雅傳流承誤之由歷漢至宋且千年用事泰山
嵩華地近亦加禮焉獨衡山晦於周秦之交五百餘年訖唐正名

五嶽終以道阻南服登封之典曠遠不能及山之蘊蓄沈蒙鬱塞之久猶有待而弗彰迨夫南宋之世祭告之禮獨隆於南嶽領祠祿者數十百人則其時五嶽都爲異域惟衡山存耳山靈之顯晦各以其時而自唐宋以來高人隱逸及仕宦之遷謫者登臨慨歎著於歌詠於衡爲盛將非其山阻曠閎深重峯疊嶂有足資羈人之惋喟發思古之幽情者與自頃同治十二年衡山廟殿燬於火粵六年爲光緒五年元度由平江謁嶽概任脩復之功往返經營又三年告成乃歷覽其名勝古蹟研考方志與人文物產之麗於茲山者重輯南嶽志編次爲十四類釐爲二十六卷體大而物博例嚴而辭雅衡山扶輿磅礴之蓄積以有待者至是盡洩其奇夫

文不馴雅而安城劉陽宛陵周怡別編翰墨志亦徇時蹊厥論偉
矣惜王氏勵志一峯使作全志豈讓五丁巨手哉光緒五年元度
約同志重葺廟殿求山志閱之則乾隆癸酉曠岫樓太史重修本
也版既漫漶又距今百二十有七年應蒐補者匪一端不揆狂簡
乃竊取王氏之義法剴古切今撰志二十六卷綜三十餘萬言藏
之名山以存文獻烏虜古今旦暮耳自有宇宙便有茲山嶽之壽
與天地無終極其有志也亦與嶽無終極前有千古後有萬年然
則蒐討舊聞兼詳時制以俟後之君子抑生其時與其地者之責
也敢條舉其目如左

星氣之書多櫟襍祥嶽承朱鳥實應壽昌觀日有臺合符區宇有

晷有度不差案黍志星度第一

五嶽真形傳自抱朴白阜有圖索邱可讀峯七十二橫絕朱方袖
中咫尺萬象在旁志圖說第二

文明間氣天南獨鍾蜿蜒磅礪最遠爲宗禹橈疊經探奇莫竟見
智見仁各領其勝志形勝第三

紫府仙都朱陵寶殿赫赫明明永綏炎甸帝者之制端居九重別
有崇祠惟德是宗志祠廟第四

嶽峙南荒不辱封禪柴望庶懸巡方有典三公視秩特溯權輿尊
王晉帝其禮絕殊志祀典第五

神嶽開天赫胥祝融虞巡觀后夏陟警洪李韓張朱光於唐宋霽

雪開雲前獻是綜志前獻第六

靈源奧區仙佛所宅羣真往來羽人古德緇黃萬眾繼者其誰清
修克厲乃與世遺志仙釋第七

文定隱衡講學有院麓山石鼓迪邦之彥高山仰止顏以集賢誰
其嗣之白沙甘泉志書院第八

蓬萊赤城羣仙所都祇園鷺嶺尊者攸居維茲嶽靈煙雲供養紺
宇琳宮其高百丈志寺觀第九

我生之初萬億斯年鴻荒幻惑傳聞邈焉不見古人乃思古蹟登
高望遠盼睠無極志古蹟第十

嶽雲五色實孕仙芝壽藤錦石紛綸葳蕤萬歲之松千齡之竹靈

藥扶衰我尋黃獨志物產第十一

峒嶺峯巔字青石赤金簡玉書莫尋禹蹟摩崖紀游礮石競刊惜
哉漁仲未遑遍觀志金石第十二

地志山經臚於乙部矧茲靈嶽跡存神禹唐徐靈期景李冲昭後
有作者嗣響雲璈志藝文第十三

夷堅諾皋紀自虞初述異搜神瑰奇譎觚維此洞天窟宅幽阻爰
撫緒餘以資談助志雜識第十四

南嶽志卷一

星度

平江李元度原輯衡山王香余歐陽謙校刊

星土職自保章氏有分土卽有分星然經星盡乎天度而中國不盡地球以十二國配周天之經星理不可曉地志家多疑之第南嶽宿當軫翼度應璣衡爲衡山所自名而星經亦有玉衡主荊州之說又衡嶽舊隸長沙郡軫旁一星曰長沙主壽長子孫昌故衡山稱壽嶽然則就衡紀星實不與他地志等也抑凡晷以測景度以測極二者合符近世法益加密衡嶽爲大江以南十數行省之主山上與南極相維繫元代

嘗遣官測日影於此祝融峯頂觀日之臺在焉志衡者安得遺之茲故約舉其要合之爲星度志云

周禮保章氏以星土辨九州之地封域皆有分星鄭注鶉尾楚也開元占經朱鳥七宿以軫爲尾故曰鶉尾

史記天官書軫爲車主風其旁有一小星曰長沙星正義曰長沙一星在軫中主壽命明則主長壽子孫昌

周禮職方氏南嶽之鎮曰衡注以其分當軫翼光輔紫宸上列註生之宿下符長育之功稱物平施故謂之衡

春秋元命苞軫星散爲荊州分爲楚國荆之爲言強也陽盛物堅其氣急悍也

春秋文曜鉤蒙山以東至南江會稽震澤徐揚之州屬權星大別以東至雲澤九江荊州屬衡星

春秋感精符帝堯爲翼之精星在南方

費直周易起張十三度至軫七度爲鶉尾荊州分
蔡邕月令章句起張十二度至軫六度謂之鶉尾

唐書天文志星紀鶉尾以負南海其神主於衡山熒惑位焉又曰鶉尾初張十五度終軫九度自房陵白帝而東盡漢之南郡江夏東達廬江南郡濱彭湖之西得長沙武陵又逾南紀盡鬱林鶴浦之地自三湘上流西達黔安之左皆全楚之分

星經黃帝占曰軫者以候王者壽命故置長沙一星以延期

又南宮赤帝其精朱鳥爲七宿井首鬼目柳喙星頸張喙翼翮軫尾司夏司火司南嶽

又北斗玉衡星主荊州常以五卯日候之乙卯爲南陽己卯爲零陵辛卯爲桂陽癸卯爲長沙丁卯爲武陵

廣雅荊屬衡星

唐書地理志軫四星其中次小者長沙而長沙入軫十六度今考湘鄉屬古零陵餘州縣十有一北抵岳州之巴陵臨湘平江南袤之衡陽衡山鄱縣安仁迤而西南得寶慶之邵陽新化皆古長沙地爲軫之終度焉

張衡天象賦爰周軫翼厥土惟荆長沙明而獻壽車轄朗而陳兵